

Politizacija reforme obrazovanja šteti izgledima BiH za ulazak u Evropsku uniju

Visoki predstavnik Paddy Ashdown, šef Misije OSCE-a u Bosni i Hercegovini Robert Beecroft i specijalni predstavnik Vijeća Evrope u Bosni i Hercegovini Sonja Moser-Starrach su danas ponovo konstatirali da će pretvaranje administrativnih i tehničkih reformi u osnovnim i srednjim školama u Federaciji BiH u politička i nacionalna pitanja nanijeti štetu izgledima Bosne i Hercegovine za ulazak u Evropu.

Visoki predstavnik, šef Misije OSCE-a u Bosni i Hercegovini i specijalni predstavnik Vijeća Evrope u Bosni i Hercegovini su zabrinuti izvještajima o Deklaraciji koju su potpisali kantonalni ministri obrazovanja Stipo Ivanković (Kanton 2), Nikola Lovrinović (Kanton 6), Jago Musa (Kanton 7), Jozo Marić (Kanton 8) i Marin Ivić (Kanton 10), kojom se sugerira da ovi ministri neće podržati reforme osnovnog i srednjeg obrazovanja.

“Značenje ove Deklaracije ostaje nejasno, ali ako će njen rezultat biti neispunjavanje zakonskih obaveza i obaveza Bosne i Hercegovine prema Vijeću Evrope koje proizilaze nakon prijema, a čije ispunjavanje također predstavlja uslov za početak pregovora sa Evropskom komisijom o Sporazumu o stabilizaciji i pridruživanju, onda bi ovo bio najozbiljniji i najteži razvoj događaja” rekao je visoki predstavnik danas. Visoki predstavnik je dodao “Ovo je pitanje koje bi moglo uništiti nade Bosne i Hercegovine u pogledu njene budućnosti kao evropske države. HDZ u Hrvatskoj vodi tu zemlju ka Evropi. Pitanje koje moramo postaviti jeste: da li opstrukcionista u HDZ BiH blokiraju priliku Bosne i Hercegovine da ide prema tom

istom cilju”.

Svi kantonalni ministri obrazovanja su podržali “Strategiju za reformu obrazovanja” u okviru koje je preuzeta obaveza da će se iz škola u potpunosti ukloniti diskriminacija, smanjiti svi nepotrebni naponi i dupliciranje poslova i sredstava, te ukloniti osnovni nedostaci u sistemu obrazovanja, te kantonalni zakoni o obrazovanju u potpunosti uskladiti sa Okvirnim zakonom o osnovnom i srednjem obrazovanju na nivou BiH. Ipak, napredak u provođenju ovih reformi je neznatan ili je u potpunosti izostao.

“Administrativno ujedinjavanje je tehnički i pravni a ne sadržajni proces” rekao je danas šef Misije OSCE-a u Bosni i Hercegovini Robert Beecroft. “On znači da se postojeće dvije škole pod jednim krovom trebaju registrirati kao jedan pravni subjekt, sa jednim direktorom škole i jednim školskim odborom, kao što je to već slučaj u velikoj većini škola u Bosni i Hercegovini. Time se ni na koji način ne utiče na nastavni plan i program ili jezike koji se koriste u školi”.

Visoki predstavnik se već sastao 24. februara sa ministrima koji su prema izvještajima potpisali Deklaraciju: Stipom Ivankovićem, Nikolom Lovrinovićem, Jagom Musom, Jozom Marićem i Marinom Ivićem kojom prilikom je rekao da kantonalna ministarstva obrazovanja i njihovi ministri moraju u potpunosti podržati reformu obrazovanja u svojim kantonima. Visoki predstavnik je tom prilikom rekao da ako obrazovanje djece i dalje bude trpjelo posljedice, ministri i njihova ministarstva će se smatrati odgovornim.